

Universidad di Aruba cu anochi informativo "Carnaval 50 mas glitter y pluma"

ORANJESTAD (AAN) — Universidad di Aruba hunto cu Instituto di Cultura, ta organiza dialuna 16 di februari, den Museo di Carnaval, un anochi informativo cu charla di tres orado tocante carnaval.

E titulo di e anochi aki ta: "Carnaval 50, mas cu glitter y pluma". Intencion di e anochi aki, ta pa miembran di prensa dialoga cu otro invitadonan y pueblo den e sala, tocante e celebracion di carnaval y su aspectonan multicultural den nos sociedad.

Especialmente e aña aki, cu nos ta corda 50 aña cu nos ta celebra carnaval, den un forma organiza ta un bon momento pa nos reflexiona riba e papel cu e aspecto cultural aki a hunga den nos bida e ultimo mey siglo.

E oradornan ta: Victoria M Razak, Ph.D. Anthropology. El a yega di haci investigacion tocante musica, festival y identidad na Aruba. Su topico ta titula: "An Anthropological perspective on the Aruban Carnaval".

E orado Juby Naar ta un periodista masha conoci, kende por ser considera como historiador di carnaval di Aruba. Naar ta conoci tambe riba tereno di cultura y folklore.

Su tema lo ta: "Aspectonan di historia di Carnaval".

Eric de La Cruz ta otro orado. E ta un etno-musicologo. La Cruz lo elabora riba e tema: "Funcion di carnaval cu enfasis riba a aspecto psicologico y social".

Universidad di Aruba ta invita tur persona cu kier sa mas di e raiz di carnaval y su aspectonan multicultural den nos sociedad pa asisti na e anochi di charla aki, dia 16 di februari di 7.45 pa 9.45'or den Museo di Carnaval (banda di Café Bahia).